


Fin di siman "CARNAVALESCO" ta tras di lomba



ORANJESTAD(AAN):

Cu enverdad miembronan di cuerpo policial mester di un sosiego, a keda demostra ayera durante parada di carnaval di mucha, con mayoria di agentenan cu tabata riba caya tabata esnan cu for di diavierna anochi no tabata tin momentonan di sosega na nan antoho, y mas bien a pasa e fin di siman riba pia dirigiendo carnaval.

Esaki ta trece cune cu lo mester evalua e actividadnan di carnaval principalmente ora cu den fin di siman nan ta cay un tras di otro y pa oranan largo y cu poco ora entre nan pa un bon sosiego.

Diavierna anochi, te dos or di madrugada a drenta finalmente e resultado di eleccion di reina juvenil di Carnaval.

Tin hendenan cu a sali di RCA y mes ora a bay ocupa nan mes na Noord mescos cu agentenan policial, pa e Cocoyoco Jam cu e aña aki

un biaha mas tabata masha anima y cu aña pasa aña ta birando mas grandi.

Pa 1 or di merdia a sali e parada di Noord, cu e aña aki atrobe a pone miles di hende riba pia for di merdia 12 or pa anochi 7 or.

Un parada cu a sobresali un biaha mas pa su orden y bunita ambiente y cu gruponan di Noord y venciario y otro gruponan di pafu di noord cu a uni pa haci e celebracion mas grandi.

Mesora despues di parada di Noord, publico a yena cayanen di Oranjestad unda e keho tabata riba e tardansa pa salida di Parada di Luz di Tivoli cu tabata programa pa 8.30 or y a sali te mas o menos cuarto pasa di 9.

Ayera por a tende di hopi hende cu a bandona lugar di spera riba e parada aki y bolbe nan cas pa sigui esaki na television na lugar di warda oranan largo riba dje debi na tardanza di salida.

E parada di luz e aña aki

tabata un di esnan mas bunita di ultimo añanan, y principalmente e parti di Las Vegas y e diferente gruponan cu e seccionnan tabata tin a engrandece e parada di luz.

Masha hopi hende di Corsow y Bonaire por a constata riba caya, kendenan a bini Aruba principalmente pa mira e parada di luz, y a goza di parada di Noord, y ayera di Parada di mucha na Playa na mes momento.

Ayera for di tempran mainta cayanen canto di e ruta pa parada di mucha di Playa a cuminsa yena y pa 12 or e cayanen tabata cera caba.

No por keda sin felicita personal di DOW, Serlimar, y di Polis cu a percura pa e paradanan fin di siman aki a bay masha ordena y cu a haci un trabao excelente pa pueblo carnavalesco por a goza di un fin di siman festival di Carnaval.

Parada di mucha mas grandi desde 1995 na Playa



ORANJESTAD(AAN):E

parada di carnaval di mucha na Playa ayera, sin duda lo mester ta e parada mas grandi di mucha desde 1995 riba nos isla.

E parada di mucha na Playa ayera sigur tabata e parada mas grandi di e decada aki cu un total di 18 grupo.

Di cifranan ricibi di lidernan di grupo por a deduci sinembargo cu e cantidad di muchanan no a yega e casi 1800 cu tabata inscribi pa tuma parti, pero si a surpasa 1400 haciendo esaki e parada di mucha na Playa mas grandi desde 1995.

Pa locual ta banda musical, disco, brassband y steelband, e aña aki musica a domina tur añanan anterior.

E cantidad di roadpiecenan tambe a surpasa tur expectativa cu mas di 70 roadpiece. E cantidad mas halto desde 1995 y ainda bao di e aña record 1994 cu e cantidad di roadpiecenan a surpasa 100.

Gruponan cu sigur a sobresali pa nan luho durante e parada na Playa tabata Dream Team di Santa Cruz cu Colarin, tambe Kids in Action y Kids of Fame, y grupo di Jairo Erasmus "Cupido".

Oranjestad a haya tambe poco mas di 400 participante di Noord cu a bini bao di number di Centro di Barrio Noord, pero cu tabata

diferente grupo di Noord cu a yuda e totalidad di gruponan den parada.

Mester menciona sinembargo cu e musica di Sound-systemnan den parada di ayera a domina riba sonido di bandanan musical manera por a scucha tur caminda despues di parada.

Manera a bira tradicion, tur caminda cu Noord Stars Steelband a pasa, nan a ricibi tambe nan aplausonan di publico.

Aplauso a bay tambe pa varios integrante di gruponan, jovencito y jovencitanan cu tabata duna un show formidable di baile di lanti nan piezanan.

Un sigur cu a sobresali tabata e jovencita Evelientje di e roadpiece di mes number.

E parada a sali exactamente 2 or ayera merdia y pa 4 or ya e cabez a topa cu gruponan cu ainda mester a sali drenta Vondellaan.

Esaki ta duna un impresion di e largo cu e parada tabata. tin lugaman cu a "time" e duracion entre 2.30 y 3 or pa su pasada.

Den edicion di mañan, ta ser spera e cifranan di carnaval cu tradicionalmente colega Juby ta bin cune pa haya un bista mas concreto di e parada y totalidad di participantenan, musica, roadpiece etc.